



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

China Masters: PVSindhu
quarterfinal-i iogo

Thailand-Cambodia arütsü nung
raratepa nisung 23 yiru



VOL. XXII ISSUE NO. 336 (ADOK 336)

DIMAPUR

ROGONÜ (FRIDAY)

RONGJUI (SEPTEMBER) 19, 2025

₹ 5.00

NPF-NDPP lokteptsü atema 'preconditions' mali: Achumbemo Kikon

Kohima, Rongjui/Sept. 18 (TYO): Nationalist Democratic Progressive Party (NDPP) den lokteptsü atema 'preconditions' kecha mali aser Nagaland nung regional tashi itshtitsü asoshi ajak tangatettep nung lir, ta Naga People's Front (NPF) ajanga Brehostibarnü jangjatsüogo.

Kohima nung aliba NPF party headquarters nung Central Office Bearers (COB) senden ka amenba sülen osangbener den jembidang, Naga nung asoshi regional sapang tashi taitba ka yangertsü tangatetba kasa aliba nung ajemdaker party anaprong temulung agüja aser süoki ia jembishinü akar, ta NPF Secretary General aser MLA Achumbemo Kikon-i ashi.

NDPP inti mungdang October 18 nü jatepa lir aser NPF-ia 63 buba Foundation Day den külemi October 21 nü inti mungdang akatsü renemogo, ta Kikon-i metetdaksü.

Senden anaprong ya Kohima nung agitsü lir.

Iba senden ya otsüsütsü asütsü, kechiaser iba nungya regional party ana lungjemba mapang asütsü imlar, ta pai ashi.

Election Commission of India indang inyakyim nung aliba ama October 21 mungdang nung shilem agitsü

asoshi party züngsemtem dang anogo 30 jelia metetdaksütsü, ta pai ashi.

Party ana loktepba sülen nüngja melentsü asü ta asüngdang dang, "NPF tenüng aser 'cock' symbol amshitsü mulungtepa lir, koba Northeast nung regional party tambotising aser India nung tambotising den atongba ama party maitsü tontgtipang lir, ta pai ashi.

Züngsem 60 aliba Nagaland Legislative Assembly nung züngsem ana dang kumaka NPF tanü tashi shidak nokdaka lir ta angatetdakja, Manipur aser Arunachal Pradesh nung NPF aliba, Naga nung tebilemstü balala nung shilem agiba aser Indo-Myanmar arütsü atsüdangba anema longkak aitba indang Kikon-i rasaa ashi.

Brehostibarnü NPF COB senden amenba mapang pangzüng pezü renema liasü aser item rongnung par Central Executive Committee meeting September 6 nü amendang lemtetba bhukumba, party nung lenir tasen asoshi party tir Apong Pongener-i lenmang lapoktsütsü mulunga aliba atema pelaba dena alitsü.

Party ana loktepba sülen ajaki mulungtepa ketdangpur tasen shimtsü, ta NPF tongti zülur-isa metetdaksü.

Eastern district temi tesayur 33 meyipa yoker

Dimapur, Rongjui/Sept. 18 (TYO): Tesayurtem agi meperiba mechi Eastern Nagaland Students' Federation (ENSF) ajanga longkak ait tenzüka sülen Nagaland sorkari tesayur 33 eastern district temi meyipa yoktsü telemteba agiogo.

Nagaland Chief Minister Dr. Neiphiu Rio lenisüba kübok ajungben senden ka amenba sülen iba mera ya agir.

Teachers rationalization policy anema nokdaka ENSF ajaga district trok nung school aser office tem shibangja lir. Sorkari subject teachers tasen shima alirtema yoktsü aser stopgap ama yangji alirtem inyakdakja alitsü asoshi lenmang bushitsü.

September 20 nü jembishinü akatsü lia ENSF-i longkak aitba anena lir.

Committee tentetstü Nagaland RMSA-2016 batch tesayurtemi memulunger

Kohima, Rongjui/Sept. 18 (TYO): Nagaland nung RMSA-2016 batch tesayur temi longkak ait tenzüker tokunü buba nung School Education Department-i parnok mesüzüksü meranga parnok akhangba asadangtsü atema committee ka kumtettsü benokba tesayur temi magizük.

Department ajanga Brehostibarnü sangdong ka nung ashiba agi, iba ken o jembitsü asoshi Abhijit Sinha, IAS, Principal Secretary to Chief Minister & Home Commissioner, Nagaland lenisüba kübok high-level senden ka September 18, 2025 nü mena liasü

Iba senden nung School Education Department, Samagra Shiksha, Law & Justice Department aser RMSA 2016 batch nungi teshimtet nisungtem dena liasü.

Iba senden nung Principal Secretary ajanga sorkar tangatetba rateta ashi aser State sorkari timtem ajuruba, talisa scale pay dak sendakba Supreme

Court nung Review Petition benoka aliba indang lemsatepa liasü.

RMSA 2016 tesayur temi mapa tajung inyakba pela agizüka jembidang, longkak aitba ajanga kaketshirtem akoksaba indang nenshia ashi aser sorkari par takhangba angatetteptsü mulunga lir ta ashi.

Pai ken o jembiba nung mapang tali agiba indang tuteta ashi aser tang iba tatsütep anentsü indang lenmang bushitsü lemsatepa liasü. Iba dak sendakba nung Sinha-i School Education Department, Samagra, Finance Department, Justice & Law, All Nagaland School Teachers' Association (ANSTA) aser RMSA 2016 batch nungi nübu tejangja shima committee ka tentetstü sentong benoka liasü.

Sorkar ketdangsür temi maneni RMSA tesayurtem dang paroki memorandum agüja aliba ya kanga junga shisadanger nüngdakba mera agitsü atema Chief Minister dangi abentsü ta

ashi. Parnoki tesayurtem dang longkak aitba anena kaketshirtemi takoksa tali ajuruba nungi nokdangtsü asoshi school-i meyipa aotsü ayongzüka liasü.

Ajisüaka Nagaland RMSA-2016 Teachers Association odongtar Renbemo L. Patton-i ashiba agi, tesayur temi iba proposal magizük.

"Scale pay agütsütsü, regularization aser state teaching cadre nung anioktsü asoshi asangsang nung mapa shidak inyak metenzük tashi danga proposal kecha magizüksü aser maneni longkak aittsü ta onoki parnok dang jangja-jangja shiogo," ta pai ashi.

Kasa mapang RMSA-2016 batch tesayur 367 tashi Civil Secretariat kuma mener longkak aitba anogo toku jungogo. Phase tanabuba longkak aitba ya September 1 nü tenzüka Directorate of School Education kima anogo asem longkak aita liasü aser pezünü buba nungi tesem melenshi.

Nagaland nunga World Bamboo Day 2025 mungogo

Dimapur, Rongjui/Sept. 18 (TYO): Nagaland Bamboo Resource Centre, 6th Mile, Sovima, Chümoukedima nung World Bamboo Day 2025 ya "Next Generation Bamboo: Solution, Innovation & Design" omen nung ajemdaker September 18, 2025 nü munga liasü.

Sentong akhumdong Development Commissioner, Tamsunaro Aier, IAS ajanga jembidang, süngkum ya Nagaland atema "green gold" lir, kechiaser sobaliba, libajen aser rongsenketzüng tsütsü kanga tongtipang lir, ta ashi.

Lai stakeholders tem dang iba yimya mesamadaktsüi tejak tenteta aser angateta amshitsü ayongzüker aser süngkum ya chiyongtsü, jenokdak tesem, teka mapa, art aser takum alitsü

asoshi tongtipang lir ta ashi.

Süngkum ya kanga kera ainer, carbon atsüoker aser ali temu wazüka ayur, anungji alima tzü-mopung melenba anema raraba nung tembar tajung lir, ta Tamsunaro Aier-i ashi.

Süngkum nung ajemdaker enterprises tenzüka, artisans nem training agütsüba aser Self-Help Groups tem yariba atema lai Nagaland Bamboo Development Agency (NBDA) nem tenüngsang agütsü aser teka mapa, osettsüset, incense sticks, blinds, lempak aser etsük amala alimai meteta akumer aser Nagaland ya bamboo industries asoshi tesepe ka kumdaktsür, ta ashi.

Iba anogomung nung shilem ka ama Aier-i Nagaland Bamboo Resource Centre nung Cane and

Bamboo Technology Park amenoktsü aliba sangdong, koba research, training aser production atema tiyong asütsü, ta ashi.

Kasa mapang hopta tepiyong training sentong ka tenzüksü, kong artisans 26 tashi bamboo design, manufacturing aser value addition nung par sempet ulushitsü.

Training nung adener nem kulizüng kakat den machineries agütsü aser Bukhaio Khamniungan nem Bamboo Entrepreneur Award agüja liasü.

Kasa sentong nung Confederation of Indian Industry (CII) den lungjemer "Facilitating Ease of Doing Business in the Bamboo Sector in Northeast India: Removal of Compliance Burdens" nüngja agüja aliba special punlication ka saya.

Mokokchung nung World Water Monitoring Day amung

Mokokchung, 18th Sept (TYO): Forest & Biodiversity Management in the Himalayas (Nagaland) Project aser Tzüla (Dikhu) Green Zone Project, Mokokchung den külem sür Nagaland Community Conserved Areas Forum (NCCAF)-i ayongzüka yangi Mokokchung town Sangtemla Community Hall nung 'World Water Monitoring Day' sentong "healthy water, healthy society, healthy life" omen dak rangloker mungogo.

Iba sentong nung Longsa, Ungma, Merangkong, Aliba, Longmisa, Khensa, Akhoya, Mokokchung yim, Meküli, Chungtia, Kinunger, Longpa,

Mopungchuket, Chubayimkü, Moalenden aser Meyilong yimtem nungi meyongertem tetsür densema arua shilem agia aden.

Sentong nung Alakteta Jaoker, Mokokchung Assistant Commissioner, Ajay Moktan, IAS-i jembidang, iba ama maparen inyaktsüba ya mapa temela masü, yangi anibelem jenti sentaka lir. Iba mapa ya yimyim ka dang masü saka teinyaktsü ka lir, ta ashi.

Tzü tongtibang indang lemsatepdang, tanü tzü alia jemteper/alia agir, tzü meli-i kecha meinyaktet, tzü ali nung dang takümü alir. Yamaji tzü mejungra tashitak kanga bulur. Tzü peria aser tajung nüngdaker. Tzü

alidakji tarutsü taküm lir, iyongji tanü iba anogo ya mejeta amunger, ta pai metetdaksü.

Tenem lima nung tzü tebilemstü ya ulura, tzü wazüka ayutsü nüngdaker, anungji, tarutsü putu asoshi wazüka ayuba mapaji tang nungi inyaktsüla. Iba dak sentakba nung nüburtemi shilem agitsüba nungi kanga tongtibang aser iba asoshi akhi asenoki tzü wazüka ayutsü asoshi beshiba den ano tawa tanü adokba technology den metemdanga inyaktsüla, ta pai ajungshi.

Tanü asenok iba ama sentong ayonga amungba ya kuliküptok ka dang masü saka iba ajanga taküm melenshiba anogo ka

südaktsütsü merangtsüla, ta pai ayongzüker. O jembiba dang nungi mapa agi inyakba jagi tuluba jembir ta ashiba metem, temelenshiji asenok nungi tenzüksüla. Mezünpur district ka ama iba mapa nunga asenoki tatishitsü süa sayutetstüla. Kodang yamaji inyakdir, tarutsü nung temelenshi kabo adoktsü imlar, ta paisa ayongzüksen.

Er. Hebo Zhimomi, Executive Engineer, PHED, Mokokchung-i "Healthy Water, Healthy Society, Healthy Life" aser Fazl Ali College, Mokokchung nung tesayur Dr. Temjensangla-i "conservation and water" onük nung ajemdaker shisalen sayur

anaprongi tagitsü aser tangatetstü onük tajung aika bener arua tesentepertem den lemsatep.

Iba sentong nung NCCAF Information Secretary, Dr. Limasenla Jamir menden liasü. NCCAF Vice-Chairman, Tokugha-i tarurtem pela-a agizükba den Tzüla (Dikhu) Green Zone Project Chairman, Imliyanger Jamir-ia o tatsüka jembir. Mokokchung-ia MTBA Youth Director, Akangtemsu-i temoatsü meshia sarasademer sentong tenzüksü. NCCAF Treasurer, Setsachum Sangtam-i shilem agir ajak dang tepela o lemsatep.

Mkg nung health worker tem orientation training agi



Dimapur, Rongjui/September 18 (TYO): Mokokchung nung Health workers tem atema Leprosy dak sendakba nung orientation training sentong ka September 18 nü CMO Conference hall nung agiogo.

Health worker tem nem training agütsüba mapang Dr. R. Toshimenla Jamir-i, National strategy plan (NPS) nükjidongji 2027 küm tashi nungbo zütsüra meshi meshia samatsütsü asoshi

lir ta ashiba den, ASHA tem ya Health system indang tongtoret lir aser parnoki department nongita yaria lokti atema inyaksü, shilem agitsü aser sendaktepa inyaksü mulunga alitsüla, ta shisem.

Laisa, tashidak keta alitsü ta temulung melemi bilemba kar danga lira ASHA temi CHO/Healthworker tem nem metetdaksütsüla, ta ashi.

Training nung shisalen sayurtemi, zütsüra keta aliba

temaitsü aser symptom tem, diagnosis aser treatment, multi-drug therapy, tashidak dak sendakba nung süngken süngra aliba, strategic plan aser roadmap 2027 aser iba tashidak meshimeshisa samatsütsü asoshi nükjidong yur aliba indang jembia liasü.

Iba training sentong nung shisalen sayurji Dr. R. Toshimenla Jamir DPO CD II/ NLEP aser Rongsenwati PMW na liasü.

Kohima nung Polling Stations draft list renema lir

Dimapur, Rongjui/Sept. 18 (TYO): Deputy Commissioner, Kohima, B Henok Buchem, NCS ajanga sangdong ka nung Kohima district kübok Polling Stations bentettsü asoshi Annexure I

nung Polling Stations indang Draft List ya renema lir aser Notice Board nunga inokja lir aser Election Branch, Office of the Deputy Commissioner & District Election officer Kohima nunga angutsü, ta

ashi.

Temelenshitsü lira, tezüluba nung Office of Deputy Commissioner Kohima nem September 24, 2025 tashinung agütsütsüla, ta metetdaksü.

Langpangkong nungertemi Dimapur topur jungdaksütsü inyaker



Dimapur yimti tiyong nung DLST-i hon jubilee tenüing nung yanglutsüba tzu ajem dak aser mapang repringdak long tongshi meketa narodong tema yutsüba angur . (Dimapur, Sept. 18, 2025).

Dimapur, Sept.18 (TYO) : Dimapur ya Naga nung meiyong yimti tulutiba akümer aser iba yimti nung alirtemi Dimapur topur jungdaksütsü asoshi bilema rongsen aser nübo agüja inyakba mapatem rongnung ka, Dimapur yimti tiyong New Market lenjem nung Dimapur Langpangkong Senso Telungjemi 2018 küm parnok Hon Jubilee amongba tenüing nung yanglutsüba Jubilee Clock Tower cum Free Public Drinking Water Booth, ano tajungba küma yanglushitsüogo.

“Iba tesem ya 2018 küm tashi nungbo jana endokdak tesem tesempatsüka liasü, anungji teshinem menemba

dang masü saka tereprangtsü nunga yimti topur raksatsüba tesem ka liasü. Iba tesemji ajanga süidang aiben temulung tipmedemi aküm aser peisasa pei yimti agi nümamedangteti aküm, anungji Jubilee tenüing nung Dimapur asoshi mapa tajung ka inyaksü lemtet aser iba jana endokdak tesem agi topur tajung tzu ajem dak aser mapang repringdak tongtibang tesem ka kümdaksü,” ta iba osangbener den jembidang DLST lenir kati ashi.

“ Onok Jubilee monger sen aika anüing, anungji khenbo alia ki ka asütsü bilem, saka teti pei kija asoshi masü saka pei alidak yimti asoshia Jubilee tenüing nung mapa tajung kabosa inyaksütsüla ta ajak mulungjang nung jembia aser angatetba agi iba mapa ya sen lakh terka dak tali endoka yanglu,” ta paisa ashi.

Dimapur ama tatsük lima nung tang ama tsükla mapang ya shishilembadaki arur aser iba tzu ajem dak meketa alirtemi tzu ratzüponga aيتدang, tangbo sen meindoki filter asüba tzu tajung iba tesem nungi agizüka ajemba angur.

“ Onok kanga pelar, kechiyong onoki tzu alia mejemteter, anungji kanga timtema liasü saka tangbo angati tzu tajemtsü tajung angutsüsa Naga nung lokti tenteti yanglutsüba atema kanga pelar,” ta anasa dokan amener kati iba osangbener dang ashi.

Iba ama yimti topur jungdaksütsü asoshi bilema inyaksüaka, ano karibo iba tesem nung jana endoker, anungji ano tajungtiba nung

merüka aser topur junga ayutsü atema DLST purtemisa temeket ajunga jungjunga yanglushir alilen aser azüklen ajak nung narodong bushia bener arua tema yutsüogo.

Iba ama pei yimti meima inyakba angateta anasa alirtemia iba ama tesem ya apayua anepalutsü aser nübortemia pei yimti topur jungdaksütsü asoshi bilema inyaksü imlar ta DLS T lenirisa metetdaksü.

Ano, osang tajung kaji, tang ita tatemlen ya alima tesem balala nungi Baptist lenirtem meyrirjang dak tali Dimapur nung Indian Mission Summit nung adentsü asoshi arutsü. Iba sentong ya DABA tenla ki tuluba nung akatsü aser Nagaland Baptist Church Council tenüing nung Dimapur nung aliba arogo lenirtemi iba sentong takok angutsüa asoshi anepaludagi.” Iba ama tangar alima balala nungi arudang asenok Khristan lima yimti yimdonga merükmerüka topur junga alitsü amai bilema teimla tulu nung parnok arutsü, anungji asenoki parnoki imlaba ama sayutettsüla,” ta DLST lenirisa ashi.

Dimapur nung akaba Jubilee Tower cum Free Public Drinking Water Booth ya DLST aser DMC na longjemer yangluba nüngshi mapa ka lir. Iba ya 2019 küm February 09 nü Dimapur nungi adokba MLA ana Wb.Moatoshi Longkumer aser Wb.Tovihoto Ayemi na lia, Urban Development aser Municipal Affairs Minister Wb.Metsübo Jamiri semzüksü.

Tizit nung Swasth Nari, Sashakt Parivaar Abhiyaan amenokogo

Dimapur, Rongjui/September 18 (TYO): Member of Parliament, Rajya Sabha, S. Phangnon Konyak-i September 17 nü CHC, Tizit, Mon nung District Level Swasth Nari, Sashakt Parivaar Abhiyaan amenoksüogo.

Sentong nung o jembiba mapang MP-i, Swasth Nari, Sashakt Parivaar Abhiyaan nükjidong metetdaksü aser lokti lenirtem dang iba dak sendakba nung tangazükba agütsütsü ajungshi, ajita asünungdang iba ajanga nüburtem ajangzüktettsü, ta ashi.

Laisa, Ato Kilonser Modi lenisüba kübok centre nung NDA sorkari lisopurtem ajungkettsü atema welfare scheme balala benoka arudar, ta ashi. Scheme ajanga tajangzük agütsüba agitsü ajungshia Phangnon-i, pei kibong anepalubajia linük yangerba

nung shilem ka lir, ta ashi. Sentong nung SDO (C), Tizit, Tumben Tsanglao aser Chairman, HCMC, CHC, Tizit, Penkham natia o tatsütsü jembia liasü.

Sentong ya Surveillance Worker, CHC, Tizit, Alih lenisüba nung agi, Pastor, TTBC, Wennyei Konyak-i Tsüngrem temaotsü meshizüka sarasadem, DPO CD II, Mon, Dr. Ngopelo Keviechu-i lokti pela agizülba o aser MO, CHC, Tizit, Dr. Taliwati-i tepela o jembia liasü.

Kasa anogo CHC, Tizit nung Health Camp ka ayongzüka agia nüburtem nem teyari balala agütsüogo.

District Level nung sentong mamenok tsüngda sentepa aliba lokti, Ato Kilonser Narendra Modi-i National Level nung Virtual Swasth Nari Parivaar Abhiyaan amenoksüba sentong nung shilem agia liasü.

LTSU-i Longleng jila nung expire osettem asadanga ao



Dimapur, Rongjui/September 18 (TYO): District Administration aser District Dobashis na den longjemer Longleng Town Students' Union (LTSU) nungeri September 15 nü Longleng jila nung yoka aliba expired aser substandard osettem asadanga oa liasü.

Iba telok nung administration nungi ketdangsürtem, Dobashi tem aser LTSU züngsemtem densema liasü, aser parnoki jila kübok dokan aser business establishment balala semdanga liasü.

Nüburtem anema toktsütsü aser consumer tem teküzmükba kübok toktsütsü nükjidong nung iba sentong ayongzüka agiogo. Meita aoba mapang osettem expiry dates, labelling, aser storage standard atema kanga junga asadanga liasü.

Iba inyakyim indang jembiba mapang LTSU ketdangsürtemi ashiba agi,

nüburtem aser talisa kaketshirtem aser jila nung alirtem tejangraba kümzüka toktsütsü atema iba jenjang agir.

Parnokisa, expire chiyongsü/oset ayokba ya health atema kanga lendong lir ta shia shishilembar ajak dang khuret angateta legal standard sülen tashi anga anidaktsü mepeshia liasü.

Kasa mapang nung District Administration aser Dobashi temi iba jenjang tajung agiba atema LTSU dang kanga pelaba lemsatop, aser tarutsü nunga iba amala mesükba inyakyim maneni nongita yaritsü tenangzükba agüja liasü.

Inspection team-isa, aibelenertem nem tekümdangtsü metetdaksüogo aser tanaben aibelenra temzüing ozüing dak ajemdaker tapet temerenshi agütsütsü ta nüburtem nem tenangzükba agütsüogo.

Dimapur DPDB senden September 22 nü amentsü

Dimapur, Rongjui/Sept. 18 (TYO): Dimapur District Planning and Development Board ita shia amenba senden September 2025 atema Deputy Commissioner, Dimapur indang Conference Hall nung September 22, 2025 anüingdang

11:00 ako nungi amentsü. Deputy Commissioner & Vice Chairman DPDB, Dimapur, Dr. Tinojongshi Chang, NCS ajanga züngsem ajunga dang iba senden nung medema arua adentsü ayongzükogo.



Thiruvananthapuram, September 18, 2025: Kerala Students Union (KSU)-i state nung police-i tashiyim amshiba anema state Legislative Assembly kima longkak aйдang police-i parnok dak tzu khaloktsuba noksa nung angur.

Pak-Saudi Arabia defence tezungzuketpi onoki asadangtsu: MEA

New Delhi, September 18 (Agencies): India nunger security atema dang masu saka region aser alima nung security atema India sorkari Saudi Arabia aser Pakistan na tsungda defence tsutsu tezungzuketp ka agibaji asadangtsu, ta MEA-i metetdaksu.

Brihostibarnu Ministry of External Affairs (MEA) nung otongdar, Randhir Jaiswal-i sangdong ka ajanga, India nunger kumzuktus aser lenla ajak tsutsu linuk security atema sorkari inyaksu, ta metetdaksu.

Saudi Arabia aser Pakistan nati defence tsutsu tezungzuketp ka agiogo aser iba tezungzuketp kubok linuk ana amokmerenertem anema parnoki longjemer inyaksu.

Jaiswal-i, linuk ana tsungda tezungzuketp agibaji sorkari meteta lir; mapang talangka nungi linuk ana jagi iba atemaji jembia aruba sulen tezungzuketp agir, ta metetdaksu.

Paisa, "Asen linuk security den region nung aser alima nung security atema onoki ibaji asadangtsu," ta metetdaksu.

Bodhbarnu Pakistan aser

Saudi Arabia nati "Strategic Mutual Defense Agreement" agiogo. Crown Prince Mohammed bin Salman-i jaokba nung ajemdaker Pakistan Ato kilonser Shehbaz Sharif-i Saudi semdangba mapang nung iba tezungzuketpi agi.

Iba tezungzuketp kubok linuk anati defence tsutsu amalitepa inyaksu aser linuk ana amokmeren anema longjemer raratsu.

Anogo ishika tejaklen ang Israel-i anunglen nungi Qatar yimtiba, Doha nung Hamas kiralongrartem maaka liasu.

LeT kiralongrar teloki India amokmerener

New Delhi, September 18 (Agencies): Kiralongrar telok Lashkar-e-Taiba (LeT)-i India aser Ato kilonser Narendra Modi amokmerenba video ka online ajanga prokshio.

September 17 nu Pakistan kubok Bahawalpur yimti nung lokti sentong ka nung Lashkar-e-Taiba (LeT) deputy chief, Saifullah Kasuri 'Khalid'-i India-i Operation Sindoor kubok Pakistan aser Pakistan-occupied Kashmir nung kiralongrartem camp amakbaji

parnoki mangyangtsu, ta metetdaksu.

Minute 2 shi video nungjisa Kasuri-i, "Parnok ayongtemji onok ayong akumtsu, parnok 'dams' ji onok meyong akumtsu aser Jammu & Kashmir ajakji onok meyong akumtsu atema mapang tongogo," ta metetdaksu.

Paisa, Pakistan sorkar aser sepaitemi LeT indang Muridke headquarters tanaben yanglushitsu atema senotsu agutsuogo, ta metetdaksu.

LeT nung commander Kasuri ya takum April ita nung Pahalgam amaktsu atema asalentong yanglusang lir. Pa ya The Resistance Front (TRF) den-a tesendaktep lir.

Tawa Jaish-e-Mohammed (JeM) commander Ilyas Kashmiri-ia, Pakistan Army tongti Asim Munir-i sepai tongti ketdangsertem dang Operation Sindoor mapang nung asuba kiralongrartem asupila sentong nung adentsu atema tetuyuba aguja liasu, ta metetdaksu.

PM Modi-i Nepal PM Sushila Karki nem tenungsang agutsu

New Delhi, Rongjui/ September 18 (Agencies): Brihostibarnu Ato kilonser Narendra Modi-i Nepal nung sorkar tasenba nem tenungsang asutsu.

Ato kilonser Modi-i phone ajanga Nepal Ato kilonser Sushila Karki dang tawa Nepal nung longkak aйдang nisung aika asuba atema tejashi lemsatep aser Nepal nung yimjung aser sorkar tashitait yangertsu atema India-i pusemer, ta metetdaksu.

Ato kilonser Modi-isa X ajanga Nepal National Day anogomong tepela salem lemsatep.

Modi-i Ato kilonser Sushila Karki-i Nepal nung tetsurtem rongnungi mezungbuba Ato

kilonser menden anguba atema la nem tenungsang agutsu, aser iba ya tetsurtem nem tashi agutsuba tatishitsu ka lir, ta ashi.

Tawa Nepal nung lanurtemi longkak sashia aйдang lanur aika asu aser Ato kilonser KP Sharma Oli-i aniba sorkar atsungdoka liasu.

Nepal nung social media nokdangba aser ochimashi anema lanurtemi anir linuk tesem ajaklen longkak aita liasu. Longkak aitertemi sorkar kiojen aika rongdoktsuogo.

Sushila Karki ya 2016 kum Nepal nung tetsurtem rongnungi mezungbuba chief justice akum.

Ato kilonser Modi-isa Nepal nung lanurtem nem-a tenungsang aguja liasu.



September 18, 2025 nu Patna nung Bihar Congress Tir, Rajesh Ram leniba nung party nung inyakerteri NDA sorkar anema longkak aita jajaba noksa nung angur.

Delhi election jakdang voters 42,000 tenung agien: AAP

New Delhi, September 18 (Agencies): Brihostibarnu Aam Aadmi Party (AAP) Delhi unit Tir, Saurabh Bharadwaj-i, 2025 kum Delhi assembly elections jakdang New Delhi constituency nung voters aika tenung agientsu atema Election Commission of India (ECI)-i temelaba aguja liasu, ta tai tonglochtsu.

Brihostibarnu Congress lenir Rahul Gandhi-i osangbenertem senden ka ayongzuka jembiba sulen ghonda ishika lir osangbenertem senden ka nung Bharadwaj-i, metetsumonga AAP voters anema inyak aser electoral rolls nungi tenung aika agiena liasu, ta ashi.

"Tanu Rahul Gandhi-i jembiba o ya Delhi assembly election jakdang Arvind Kejriwal-ibo jembiadoker liasu," ta pai metetdaksu.

Bharadwaj-i, "2024 kum December 29 nu Arvind Kejriwal-i iba tebilemtsü onuk lemsateper liasu. Osangbenertem senden ka nung New Delhi constituency nung voters list nungi tenung aika agienba pai metetdakja liasu. Kejriwal'er constituency nung voters tenung aika agienba aser voters tasen aika, shilem 12 tashi bendenlokba osang pai metetdaksur liasu," ta metetdaksu.

AAP-i, "Yakum December ita nung anogo 15 tsungda New Delhi nung electoral roll nung voters tasen shilem 10 jungnu

bendenlok. Iba sulen takum January 2-4 anogotem nung bushisungdangba mapang nung tashishiba benoker nisung 11 jaoka asungdangya. Parnok ajaki tenung agientsu atema parnoki applications magutsu ta ashi," ta metetdaksu.

Tamalen AAP MP Raghav Chadha-i osangbenertem senden nung jembiba metetdakja Bharadwaj-i, item ama inyakyimji AAP tamakok ngudaktsutsu atema inyakba liasu, ta ashi.

Bharadwaj-isa, "2025 kum election jakdang Chief Minister Arvind Kejriwal'er constituency nungi voters tenung 42,000 agiena liasu. Iba sulena Kejriwal nem takok mengudaktsutsu atema votes 6,100 agientsu atema applications aguja liasu," ta metetdaksu.

Ano kulen voters tasen tenung 10,500 bendenloktsu atema applications agutsu, aser ibaji ajanga tasungdangba akatsusa akumer, ta pai ashi.

Election Commission nung tongti ketdangsertemi telangzuba agutsutsula, ta shia Bharadwaj-i, "Chief Election Commissioner Gyanesh Kumar nungi tenzuka ketdangsertem dang tasungdangba akatsula," ta metetdaksu.

Aam Aadmi Party-isa electoral roll nung ochimashi tulu aliba atema kanga teladak sua bushisungdangtsula, ta takhangba agutsu.

My Handloom My Pride

WELCOME TO

State Handloom Expo (SHE)

Hathkargha Mela

UNDER AATMNI RBHAR BHARAT UTSAV

10th to 23rd SEPT, 2025

10:30 AM TO 5:30 PM

at Urban Haat Dimapur, Nagaland

FREE ENTRY

ORGANISED BY:
NAGALAND HANDLOOM & HANDICRAFTS
DEVELOPMENT CORPORATION LTD.
(A Govt. of Nagaland Undertaking)
DIMAPUR : NAGALAND

SPONSORED BY:
Office of the
DEVELOPMENT COMMISSIONER (HANDLOOMS)
MINISTRY OF TEXTILES, GOVT. OF INDIA, NEW DELHI



TIR YIMYIM YIMOBILEM (EDITORIAL)

DIMAPUR FRIDAY, SEPTEMBER (RONGJUI) 19, 2025

Ajaki mapa shitak inyak nungbo –

Shiba südir sang, alima nung nisung kati dangbo pei alidak mapa ajak meinyaktettsü, iba jagi government nunga department aser ministry balala lemsar inyaker. Kasaji arogo aser lokti nunga aser kibong nunga mapa inyaker aser kinungertem rongnunga mapa lemsar inyaker. Aji oda, mapa lemozükba telok mesüra nisung jagi shitak inyakra, iba jagi alima topur ajungtsü aser nübortem nema pei lima agi nümadangteta bilemba mulunglem shisatsü tajung ka agütsütsü. Idak nung jagi alima nung süli, yimti nung süli mesüra kiyong ka nung süli telungjem, tesünep aser mulunglemtep adoker. Aji oda, kidang kibong nunga tsüraburi yakta saker tanur mesoa lesson bushidaktsür külen jungjunga soruchioka chiyongdaktsür schooli yoker aser school nunga tesayurtemi tanurtem dang jungjunga sayur aser tanurtemia jungjunga angar aser angazüker ta asüba agiang tesüsa tanurji nisung tain tajung ka akümer, anungji iba nisungba jagi nübortem meima inyaker. Ibaji ajaki pei tata shilem shitak inyakba ajanga lir. Iba amaji asen lima nung yimsüsürtemi temzüng ozüng aser terenlok sentong shitak lemtettsü aser ibaji ketdangsertemi shitak mapa kuma inyaksü aser idangji nübortemia pei asoshi inyaksür ta bilema tenokdangba magütsüi yariteptsü ta inyaka otetra, kiojena aser lenmanga teti tajung asütsü. Kasaji, tzüa aser light-a teti shitak arutsü. Aji oda, center nungi gari lenmang yanglutsü sen yoker aser aji state government-i agizüka mapaji inyaker, anungji iba mapa nung ketdangser engineer-temi mapaji shitak jungjunga repranga inyakdaktsüra, lenmangji shitak tesadem asütsü, lenmang nung motzü matsüngtsü aser melamelaa meraksatsü. Iba ama lenmang ajungbaji center-i sen shitak yok aser state nung yimsüsür, ketdangser aser engineer-temi mapa shitak repranga inyak ta pei pei mapa nung shitak shitak inyakba agi tajung ataloker. Iba amaji kiojen yangluba nunga government nung yimsüsür, ketdangser aser mapa repranger engineer-temi pei mapa nung tapok mepadaktsüi shitak shitak inyakra, kija estimate nung aliba ama shitak renemtettsü. Ajiüsüaka, mapa lemsar inyaker rongnung tsürabur aser tesayurtemi jungjunga anepaluyonga tanuri mangara majungtsü. Kasaji, nübortem asoshi terenlok mapa inyakba nunga yimsüsür aser ketdangsertemi shitak inyakyonga mapa nung nokdaker engineer aser contractor-temi shitak meinyakra, gari lenmang yangluba maparen nungjia lenmang temesü asütsü aser kilentzü tema aser lenmang teküpbok ta yanglutsü mesüra oset agi matu yanglutsütsü, anungji ita anasemka lir poksaa aotsü. Kasaji, kiojen yangluba maparen nunga mapa nung nokdaker engineer aser contractor-temi shitak inyaknyonga azüklen alir yimsüsür aser ketdangsertemi shitak meinyakra mapaji meshitaktsü. Ibaji bilemdanga asenoki asen lima nung terenlok mapa inyakbatem ya medemdangra, atangji, shitak inyakbabo kangabo mangutsü. Ibayongji, tanü government nung department aika tezüluba nungbo mapa aika inyakba alitsüa akok saka shitakba alijak nung nisungi angutsüsabo kecha maka ta mapa inyaker meinyakma akatsüba agi mapa maka kuma inyaktetba angur. Joko, asenoka kechi watang nung nokdaka lidir liang, mapa shitak inyaker akümtsüla. Aji oda, government office nunga ki lapoktsür aser shibangtsür chowkidar, ki aoker Sweeper, file anepalur LDA aser Computer Assistant nungi tenzüker tuluba tashi agi pei mapa meteta mapang shitak amshia mapa shitak inyakra, iba jagi memetetika asen lima nung terenlok mapatem ajaklen shitak -shitak inyaka aoba angutsü. Atangji, inyaknyonga karbo mapa mashi aser memetetba purtema alitsüa akok, kechiyong Nagaland ama nungbo, ashiko engineering mazüng ser engineer inyaka alitsüa akok aser medical mazüng ser doctor inyaka alitsüa akok, anungji itemjibo anentsütsüla aser parnok melenaji mapa ashir tekümdang aser tenendak nisung shima inyakdaktsütsüla. Joko, asen lima nunga asenok ajaki pei lemozükba mapa nungbo shitak –shitak inyaka aoba sobaliba ka tenzüksüla. Iba jagiang asen lima aientsü aser asenoka asen lima agi nümadangteta alitsü.

OLEMSABANG

Asen lima tarutsü nükla aser teinyaktsü

~ Lanuchuba, Signal Angami, Dimapur

(Yashi adok nungi...)

10. Village, town aser compound pei yari mapa inyaktsü aser bener arutsü jenti tanü asen putu den apet lir. Anungji arung joko asenok nüburtemi election nung atoker teinyaktsü inyaktsü shia inyakteptsü O bang ka südi.
11. Saka asenok asoshi shirang tulu ka lir aji takar , sensakar aser teyungtsü aji takara masü aser sensakar masü yamalatem lemdanger lemsar aliba agi.
12. Sensak tia aser sentsütsür kodang ajurutir yamai kümatoker kinunger, yimer,medemer aser pei kin, tashi agi sentoker aser sentokba agi joko teyimla ajak samar lir, anungji asen nübur, ka Kümer longjemti arung aser melenshir aroki yaritep,temeimtep agi ajak ka kuma longjema inyaktsüla. (Temeshi Lai Tenüngsang Ken tapu 41-1 nungi 2. Shibai sensakar aser tashi maiter indang bilemstsür, pa tepelatsü. Kibubai pa anüktsü, taküm arishi talang, aser alima nung temoatsü agütsütsü, aser tsükchiri mulungba nem pa magütsür.)
13. Iba sensak tia ajurubaya pa or lar kibong ka asoshi, mesüra shirang tapu balala mesüra nübur asoshi election nung tokteptang , yamala mesük agi shidak nung sentsütsür akümba timba lir. Anungji pei kin, kinünger ajak ka kümer, meimteptsü mapang tongja tongoko arungma tepong ka ser longjemshiti.
14. Saka election mapang shirangba tulubaji Sen alemba aser atokera shidak meinyakba khar lemsar.
15. Takari pei atoknüdang sen crore jenti indoktsü aser adoker pei area constituency nunga shidak meprangtsü aser taneben ano tokteptsü sen bentendang asen lima aser nübur arok akoksar.
16. Ano tai tulubaji election candidate tai lir, nenok atoknüdang nenoki sen aser tapu balala alemdang raksatsü, anungji nüburtem idakji anitak aser tanü iba tia kumoko.
17. Election ya asenoki temenen ta tebilem ya alima matem tashi alitsu, kechiaser nübur anitsü Tsüngremi nungloktsüba mapa.
18. Saka asenok nüburtemi tai inyakbaji candidate ajak dang sen tali tali meshir agiba agi, joko ajak nung development aser terenlok ajak sama.
19. Arung election candidate pa mesüra lai joko senotsü amshiba ya anendi joko melenshir terenlok mapa asoshi nokdakti.
20. Ya shidakbabo yamai democracy election yimya nungbo mali, saka asenok nüburi mangabayong NBCC aser ABAMetc. Yamala müsük ajanga election yimyim ayim saka mangar, anungji arogo, yimten, lanur ajak ka longjemer, senotsü inyakyim aser tanga lenmang lemtet takang yangludi arungma.
21. Ano shirang tapu kaji makamait aser sentsütsür noklang shilem nung eighty percentage alitsü asadangtetter, Ibayongji yamai ang nüburtemi inyaker amai ajitetter.
22. Saka ano tashi maitkaji asenok nüburtemi asen Teyanglur Kibuba Yisü sentoker ali ama ajitetter, süra asenoki Temeshi Lai tekong khar lemsar.(Mathi 6-31 aser 33. "Anungji 'Onoki kechi achitsü ?' Mesüra 'Onoki kechi ajemtsü?' Mesüra 'Onoki kechi abentsü?' ta shisa tebulu. Saka tamasa nenoki Tsüngrem yimli aser pa temeshiba bushiang, aser item ajak nenok nem bendenloktsütsü.).
23. Anungji asenok ajaki kanga meranga inyaktsü aser bushitsü joko azü mesen nem mokokdaktsüli. Tanü putu nung meranga inyakba kangarabo mali, anungji yamai süa angazüti asenoki Tsüngrem tama südaktsüti maneni Temeshi Lai tekong khar lemsar.(Mathi 11-28. "Nenok tebelemer aser khu reta abener ajak kü dangi arung aser ni nenok nem anisüngzük agütsüdi.)(Mathi 7-7. " Meshiang, aser aji nenok nem agütsütsü, bushiang, aser nenoki angutsü, akoshiang, aser aji nenok nem lapoktsütsü.)

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pastor tem atema counselling nüngdaker: Rev. Dr. Richard Howell



September 16, 2025 nü Nagpur (Maharashtra) nung aliba Hotel Tuli International nung ayongzükbä All India Congress on Church in Mission (AICOCIM) nung taoba mapang Evangelical Fellowship of India aser Asia Evangelical Alliance naprongla nung General Secretary inyaksang, Rev. Dr. Richard Howell-i jembidang tangokba noksa nung angur.

Nagpur (Maharashtra) September 18 (Agencies):

Taoba mapang Evangelical Fellowship of India aser Asia Evangelical Alliance naprongla nung General Secretary inyaksang, Rev. Dr. Richard Howell-i, aiben pastor tem kanga azüngmeyaker, anungji parnok khuret pungbatsü atema anisüngzükdak nüngdaker, ta metetdaksü.

September 16, 2025 nü Nagpur nung All India Congress on Church in Mission (AICOCIM) tanünübuba sentong nung jembidang Rev. Howell-i, "Iba lima nung kanga azüngmeyakertemji pastor tem lir. Pastor tem anepalu mesüra tatidang nung tsüksü, kibong nung timtem adoktsü aser shisa ramatsü," ta ashi.

"Sannükertemji shibai anepalur. Parnok anepalurtem mali," ta pai ashi.

Howell-isa Asia tesem balala nung pastor apuanitem nem tejenokdak agütsüba ajanga parnoki timtem tejashi lemsateptsü akokba, metongshiba aser taneptsüba anguba metetdaksü.

"Item ama maongka agütsübaji kanga ishika dang lir, aser ibaji ajanga Arogo nung lenirtem aikati tema nung tashi itta lir ama sayuaka atangji

nungbo parnok ola madoki timtemer," ta paisa ashi. "Pastor tem-a tatidang nungi jenbua mali. Satan-i pastor tem kibong raksatsütsü meranger," ta paisa metetdaksü.

Howell-isa, pai Delhi nung tentetba Caleb Institute ya tashi lular aliba pastor tem anisüngzükdak, meyipa reprangshitsü tesem aser counselling teyari angudak tesem lir, ta ashi.

"Onok ket nung nenok jenoktsü atema lir. Nü kinüngtsü anir arung. Onoki nenok jenokdaksütsü aser mesütsü. Onok ket nung counselors lir. Onoki nenok den jembitsü. Nenok jenoka aliba atema nenok dang nungi sen memeshitsü. Yagi arung aser kar den nü khuret lemsatepang," ta pai metetdaksü.

Iba ama reju lapokba ajanga pastor tem aikati teyari nguogo, anungji timtem khuret tuluba makümdang iba maongka agiang, ta paisa shisem.

Kasa sentong nung taoba mapang World Vision India nung CEO aser World Vision International nung Faith & Development tongti, Rev. Dr. Jayakumar Christian-i, India Arogoi taküm alitsü tjabaji angatettsüla aser loktiliba nung sensakertem tenzüksüla,

ta ashi.

Rev. Christian-i, "Khristan yimsü ya tashi maliba aser bendanga agütsüba nung tera- yanga lir. Yisuiä timtema asütsü taishitsü sayuba ya tashi temaitsü lir. Anungji Arogoi timtembaji atakatem ama mezüngshitsüla saka Khristai sayuba benschitsü atema maongka ama agitsüla," ta metetdaksü.

"Temelenshi tulu adokbatemji teti agia timtemba nungi adoker. Kodang Arogoi kiojen asüba aser tashi arishiba nung temelung agütsüdir maitsü samaadoktsü. Ajisüäka kodang Arogoi timtem arema inyakdir ibaji ajanga linüktem nung temelenshi tulu adoktsü," ta pai ashi.

Christian-i, "Asenoki tashi arishia inyakra asenoki kulisübaji asen meketa aliba lima den kasa dang asütsü. Ajisüäka asenoki tashi meiti tamang manokshii lira Tsüngrem tashi jungkai adoktsü," ta ashi.

"Arogoi azüoktsü mesüra ambangyim asütsü memerangtsüla. Bendanga agütsüba, ajemaluba aser temeim mapa ajanga chichiba tashi sayutsü atema Arogo ajar," ta pai ashi.

Rev. Christian-i, "Asenoki yangluba asalentong ajanga Khrista osangtajung tejakleni maotsü. Ajisüäka kodang asen taküm tanela agi süngdir ibaji ajanga tangar taküm nunga temelenshi adokdaksütsü. Sentong agi taküm melenshitsür masü saka taküm agi dang taküm melenshitsür," ta ashi.

"Timtem tensa nung liaka Arogo aliba tetezü Tsüngremi asenok mesendok," ta pai ashi.

Christian-i lenirtem dang, taküm ochishia aliba aser ochi jembiba meyipa reprangshitsüla, kechiyong anemsü ajanga Khrista kulisüba iladaktsür, ta ashi.

"Tenla kidang tongmelang tamangertemi asenok reprangdar. Asenoki jembiba ama asenoki taküm alir asü? ta parnoki metetner. Ochishia alitsüji shimtsü onük ka masü, saka Arogo züngsemtem matsüngdang asenoki jembiba amaji taküm lia sayutsüla," ta pai ashi.

Iran nung Khristan ka küm10 tepuokdak ayutsü obendang agütsü

September 18, 2025: Islam yimsü toktsür Khristan yimsü dangi meypisang, Iran nunger Mehran Shamloui-i tamalen court-i agütsüba obendang ka agentsü atema tanaben ken o angadangtsü mepishi, saka Supreme Court-i magizük.

Shamloui ya 2024 küm pua liasü. House church ka nung shilem agiba atema aija pa küm 10 ser ita 8 tepuokdak ayutsü obendang agüja liasü.

Pai Islamic özüng alema inyak aser linük anemba teloktem nung aden, ta court-i aitsü.

Pa jail nungi bail nung chiokba sülen pai linük toktsür ajen. Pa Europe nung jenoktsü tebilemba liasü saka Turkey nung lia apuba sülen taküm July ita nung pa tanaben Iran-i anir arua liasü. Shamloui ya tang Evin Jail nung puoka lir.

Center for Human Rights in Iran (CHRI)-i ashiba agi, yaküm küm den medemdangra taküm January ita nungi April ita tashi nung Iran nung Khristantem anema inyakba tatalokbatem kanga bulua kümogo. 2024 küm Iran nung Khristan 96 aija parnok ajak senteper jail

kümzüük küm 263 puoktsü obendang agüja liasü.

CHRI Executive director, Hadi Ghaemi-i, "Iran nung ketdangsertemi Khristantem jenti apur, aser küm aika jail nung puoktsü nükjidong nung Khristantemi linük security anema inyaker ta tai tongloksür," ta metetdaksü.

"Khristan yimsü dangi meyiper aika akümba agi parnok [Iran ketdangsertem] tsübur. Ibayongji parnoki nokdangtsü atema Khristantem anema inyaker," ta pai metetdaksü.

ANOGO ABEN TSÜNGREM DEN

Yisu bushir

Aser Simon aser pa den alirtem pa sülen ani taka ao. (Mark 1: 36)

Osangtajung kakettem nungji reprangra Simon Peter ya pa mulung nung kechi ali sapoka jembiba nisung ka ta ajitetter. Kodang Yisui Pa asütsü indang ashi Peteri "ya kodanga ne dak mataloktsü" ta ashi. Kodang Yisui nenok ajak metsüdaktsü aser ni toktsütsü ta ashi, Peteri ajaki tokjaka nibo metoktsütsü ta nangzüük. Saka menangzüksüsa aküm. Saka pa dak tajung kaji Yisu teti bushia Pa sülen anitakba taküm ka liasü. Kechiyong nutsüngtem ajak jenshir alidang tatem metettsü asoshi pai anitak. Yisu shia aruogo ta osang angashidang leperi asema ao. Yisu ajurutsü asoshi tzü manung jaja. Peteri jembiba aser inyakba ajakjibo teti shitak masütsü akok saka Yisu maneni bushia aliba taküm ka liasü, ibayongji maneni Kibuba ajurua ina aliba nutsüng ka asü.

Tangari naji shiba ta repranger? Rongsen, konang, tetushi, takok, tepela, jangratem, pei agitsü dang bushiba taküm ka ta ajir asü? Mesüra mapang ajak nung Yisu aser Pa temeshiba bushiba taküm ta metet? Ne mulung ajak agi jangra Pa bushir asü ? Tsüngrem tenangzükbaji "Nenoki ni bushitsü aser ni angutsü, kodang nenok temulung ajak agi bushidir" (Yer. 29: 13).

Europe Evangelical Alliance Tir menden atema Andreas Wenzel shim



Andreas Wenzel

September 18, 2025: European Evangelical Alliance (EEA)-i Tir menden atema Germany nungi Andreas Wenzel shimogo; pai Rev. Dr. Frank Hinkelmann melenzüker.

Bar, Montenegro nung EAA hybrid 2025 Members Meeting nung pa Tir shimba osang metetdaksü. Iba senden nungji EEA Board den staff tem aser Europe tesem balala nungi evangelical lenirtem aden. Kasa sentong nungji Montenegro nung pastor tem den-a temeja senden ka amen.

Wenzel-i 1990 küm nungi Word of Life Germany nung inyaker; pa yangji mezüngbuba youth pastor liasü aser tanga menden balala nunga inyakogo.

2012 küm pa Word of Life Europe leadership team nung aden. Iba team ya linük 18 nung lir. 2023 küm pa Word of Life Europe nung Director aküm.

Word of Life nung inyakba dak alia pa German Evangelical

Alliance nunga repsema inyak.

2017 küm nungi pa European Evangelical Alliance Board nung züngsem ka liasü.

EEA nung Wenzel Tir shimba atema tenüngsang agüja EEA nung co-general secretaries- Connie Main Duarte aser Jan Wessels nati, Wenzel-i mission wadang atema nendaka inyakba metetdaksü.

Duarte-i, "Mission atema Wenzel dak tejangraba tulu aliba ajanga onok tejakleni aotsü atema ajak ajungmesotsü," ta ashi.

Wessels-i, "Wenzel-i Laishiba nung ajemdaker Europe nung evangelical kibong longjemdaktsütsü aser tashi itdaksütsü atema inyaktsü," ta ashi.

Rev. Dr. Frank Hinkelmann ya 2013 küm nungi European Evangelical Alliance (EEA) Tir inyaka liasü. Pai kümsük (term) asem abensaa Tir inyakogo.

European Evangelical Alliance ya 1951 küm tenteta liasü aser iba tentet nung linük 35 nungi evangelical züngsem million 23 dak tema lir.

EEA-i telongjem adokdaksütsü, tamangba yimsü temeden ajungkettsütsü aser Arogo dak sendakba tebilemtsü onük balala atema inyaker.

AO OSHI ANGAZÜKDAK:**TANÜ ANGAZÜKTSÜBA OJANG****Teyindangba**

(n) Tetongdangba (veil, curtain)

* Kidang kishi aser kichiba ajak nung teyindangba sü enoker.

Teyip

(n) ango teküp (fish scales)

* Asenoki ango teyip machir.



Tir Yimiyim

OLONG PAITEP # 7275

1			2		3		4		5	
6		7								
					8					
9				10						
						11				
			12							13
	14							15		
					16					
			17							
								18		
19										

TIPLIN

2. Teburtemi tejak nung awaba

- (8)

6. T _ _ _ em

- (3)

8. Tzüik ayudak

- (3)

9. Nüngdakba dang timba

- (6)

11. Züina ao

- (4)

12. Yangi tzü angur

- (5)

14. Tangar dang nungi tali

- (4)

16. Senyong masü

- (6)

17. Oadokdi

- (3)

18. Tzü tarok

- (3)

19. Yimtaklir aikati iba ya ki den

külemi yanglusemer

- (8)

LANGTSÜNGLEN

1. Temejangdak

- (6)

3. Nisung ka mapa inyaksü nübo

- (4)

4. Azüintsü asoshi mejemba

- (6)

5. Tesangwa agütsüba

- (5)

7. Tila masü

- (4)

10. Tebenjem tetsür chanu

- (4)

11. Tekolak nung inok

- (4)

12. Tetsünga

- (6)

13. Tangar inyakba ka inyak

- (6)

14. Tim masü ta ashi

- (5)

15. Asalendong

- (4)

16. Tanü dangtsü

- (4)

OLONG PAITEP # 7274 TELANGZÜBA**TIPLIN :**

1. Telok, 4. Aluru, 6. Ozünga, 8. Emk,

9. Kin, 10. Teti, 12. Süir, 13. Jen,

14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,

5. Lenti, 7. Tajangzük,

11. Teronem, 12. Sempa,

13. Jahaz.

NAI-A YA METETTER

India nunger ISA officer tem rongnung timtiba transfer asüsangji Ashok Khemka lir. Pa indang career nung taoba küm 34 tsünga pa 66 ben transfer yokba sülen pai pa mapa nungi anenba sangdonga liasü.

Tanur asoba anogo nung salem osang den noksa angati adokdaksünura - Tenünga, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimiyim bureau tem nung agüjang.

Assam BJP-i lemsatepba AI video ka agi mepetmesü adokdaksü

Guwahati, Rongjui/ September 18 (Agencies): Assam Bharatiya Janata Party's (BJP)-i, artificial intelligence (AI) amshia yangluba video ka, kong par party-i state sorkar mekümtetra Assam ya Muslim nungeri amokbangba state ka küma aotsü sayua liasü, iba video ajanga mepetmesü adokdaksügo aser Congress-i Brehostibarnü police nem tashishiba ka agütsü sentong aliba sangdongogo.

Video koba Hombarnü BJP social media handle tem nung prokshia liasü, iba pusema party-i jembiogo aser iba ya ozünga alema aruba immigrants temi amokmerenba sayuba ka dang

lir ta shiogo. Ajisüaka Congress-i par party tir aser Member of Parliament, Gaurav Gogoi dak rangloker inyakba atema video ya aitsüogo.

"BJP IT cell-i yangluba noksa, inyakyim aser o ya agi Assam lokti tentet dak tera anaktsüa tashi mali. Assam nung nüburtem temaba jenjang tongtettsü atema teyari agütsüba yimden yimsüsürtem nüngdaker," ta Gogoi-i X nung zülutsü.

Congress media department-i ashiba agi, par party aser tir dak rangloker social media nung communal video ka lemsatepba atema Assam BJP anema FIR benoktsü ta shiogo.

September 22 nü Bodoland

Territorial Council (BTC) election magütsü tsünga sayaba AI video nung "Paaijaan pungmang atalokdaksütsü onoki memelatsü," ta tagline agütsür liasü. BTC kübok Assam nung district pezü lir. Kasa mapang nung Assam assembly elections-a taruba küm April-May ita agütsü lir.

BJP-i Gogoi dang "Paijaan" ta ajar, shiba Pakistan den sendaktepa lir ta shia Chief Minister Himanta Biswa Sarma-i February ita nungi aija arudar. Special investigation team (SIT) kati iba taittsüba dak sendakba nung iba ita report ka agütsüogo, ajisüaka parnok report ya yimjak nung memettdaksü.

Mizoram nung sen crore 102 alang meth apu

Aizawl, Rongjui/September 18 (Agencies): Mizoram nung security force temi sen crore 102.654 alang methamphetamine tablets Indo-Myanmar arrtsü nung puogo, ta ketdangsürtemi metettdaksü.

Assam Rifles aser Mizoram Police na senteper Champhai district kübok arrtsü nung aliba Zote yimtsünga meita aoba mapang iba temesepba mozü ya pua liasü.

Assam Rifles otongdari

ashiba agi, itangitertemi iba tesem nung temesepba mozü shibelenba indang osang agüja liasü. Iba temesepba mozü bena alisang yagi sepaitem anguba sülen oset toktsür aremi jena ao.

Iba tesem kanga junga meita aoba sülen methamphetamine tablets seret 34.218 ngutetogo, koba shishilembadak sen crore 102.654 alang asütsü. Sepaitemi apuba temesepba mozü ya Champhai excise aser narcotics department nem bendanga

agütsüogo.

Mizoram nung India aser Myanmar na arrtsü km 510 aliba ya Assam Rifles-i anüker aser ozünga alema inyaksangshiba maparentem nokdangtsü atema parnoki kanga meranga inyakdar.

Aizawl nung 23 Sector Assam Rifles Headquarters-i battalion asem achayanger aser battalion asemprongla kübok Company trok lir, shirnoki arrtsü kümzüka toktsütsü aser meita atatsü asoshi jenjang balala agia arudar.

Assam-Meghalaya taxi ken onung Ex-Minister Rakkam indang gari nokdang

Guwahati, Rongjui/ September 18 (Agencies): Assam-registered tourist garitem Meghalaya-i maitdaksüba dak sendakba nung ken o tamajungba küma Brehostibarnü longkak aitertemi taoba Meghalaya Education Minister aser NPP legislator Rakkam A. Sangma indang gari Jorabat nung nokdanga ayu.

Osang ajanga ashiba agi, Assam nungi taxi anishirtem telok kati Sangma indang gari nokdang aser yimiyim ayimba den pa Meghalaya-i meyipa aotsü takhangba agüja liasü.

MLA shiba Garo Hills-i oya liasü pai mapang tatsüka lir video ka ajanga, Assam Police-i teyari agüja pa iba tesem adena oteta liasü ta ashi.

Longkak aitertemisa Meghalaya-registered tourist garitem Assam-i midaktsüi nokdanga ayu, aser iba ajanga gari senzusenpong mejungi

bangdaka yua liasü. Sangma-i state anaprongla dang ken o ya sensaksem ajanga bentettsü mepeshia metetdaksügo aser ashiba agi, mapang talangka mangatettep nung aliba ajanga anatsülen akoksatsü ta tekümdangtsü metetdaksügo.

All Khasi Meghalaya Tourist Taxi Association (AKMTTA)-i, Meghalaya nung nüngtugu tesemtemi Assam nung amendaker aliba tourist taxi tem meyoktsü atema akhangba dak iba longkak aitba ya sendaka lir. Iba telok yagi, Assam nungi aruba garitem yagi alima penzürtem atakzükja aliba tesem ka nung dang toktsütsü, aser iba sülen Meghalaya indang taxi temi parnok anir senzüdaksüner.

Assam taxi driver temi ashiba agi, Meghalaya nung parnok dang senchi sen 25,000 tashi achir saka kidanger state tem nungi taxi tembo Assam

nung sadem sadema senzür. "Meghalaya police-i parnok association nongita yarir saka Assam police-i onok atema kecha minyaker," ta longkak aiter kati ashi.

Ken o dak sendakba nung Assam Pradesh Mahila Congress tir Mira Borthakur-i, local taxi anishirtem nem teyari magütsüba atema state sorkar aitsüogo.

Borthakur-isa, Chief Minister Himanta Biswa Sarma dang iba ken o ya Meghalaya CM Conrad Sangma den sensak asemtsü ayongzükogo. "Assam indang garitem idakji nokdangra kechiba Meghalaya indang garitem idaki arudaktsütsü," ta lai ashi.

Kasa mapang nung Meghalaya sorkari AKMTTA dang ken o bentettsü atema Chief Secretary-i aniba high-level committee den sensak asemtsü asüngdangogo.

Thailand-Cambodia arütsü nung raratepanisung 23 yiru

Phnom Penh, Rongjui/Sept. 18 (Agencies): Mangatettep aliba arütsü nung ali agia arur ta linük anaprongi tai tongloksütepba sülen Thailand-Cambodia arütsü nung Bodhbarnü ano raratepa liasü. Iba mapang Cambodia nung nung nisung 23 yiru, ta Cambodia information minister Neth Pheaktra-i ashi.

Thai ketdangsür temi Cambodian civilian tem dak tear gas, rubber bullets aser noise-making devices amshi ta pai aitsü.

Kasa mapang Thai mitkari par mera agiba bhukuma Sa Kaeo nung arütsü nung army temi barbed wire mesangba mapang Cambodia nung 200 shi adenshia longkak ait ta ashi.

"Tensa azüoktsü aser nisung adenshia aliba ainshidaktsütsü atema tear gas aser rubber bullets amshitsü nüngdaka akum, aser Cambodia nungeri Thai mitkartem dak long aser danga osettsüset mereploksü,"

ta ashi.

"Cambodia nungeri Thai li nung aibelen aser Cambodia ketdangsür temi parnok menokdang, ibai rara mesüba lir, koba ceasefire nung aibelen ka lir," ta Thai mitkari ashi.

Sepai ka aser Buddhist monk dak sendema Cambodia nung 23 yiru, ta Pheaktra-i ashi.

Mangatettep ya Banteay Meanchey province kübok Cambodian territory nung adok, ta pai ashi.

Social media nung kanga bulua prokshiba video ka nung Cambodia nung kati tear gas grenade ka shir Thai sepaitem tsütsü mereploksüba nguogo.

Mangatettep aliba arütsü tesem ka nung iba mepetmesü ya adok aser ibai July ita anogo pongu raraba tembangtsü asoshi linük anaprongi ceasefire ka sangdongba sülen tensa tamajungba akumba tejangjatiba ka alitsü.

Iba mangatettep aliba tesem ya Sa Kaeo province kübok

Ban Nong Ya Kaew yimtsüung nung keta lir ta Thailand-i ashir, aser Cambodia-i iba ya Bantheay Meanchey province kübok Prey Chan yimtsüung nung keta lir ta ashir.

Taoba ita Thai ketdangsür temi yangji barbed wire mesang aser hopta aika yangji linük anaprong nungi civilian temi longkak aita aru.

Linük ana tsüngta arütsü 817 aliba tesem kar nung ar junga ladanga malidak küm noklang ka dak tema linük anaprongi kibur akumtsü meranger, koba France-i 1907 nung Cambodia ya par kübok alidang mezüung ladanga liasü.

July ita arütsü mechi rara adoka nisung 48 takum sama aser nisung meyirijang aika pei ki yutsür tesem balalai jena ao.

Ajisüaka Malaysia tetsüngtai ia yangluba ceasefire ka nung July 28 nü linük anaprongi mulungtepa rara tembanga arütsülen tensa süngjema lia aru.

Saudi Arabia-i Pakistan den mutual defense pact zülutep

Islamabad, Rongjui/Sept. 18 (Agencies): Saudi Arabia aser nuclear nok-nü aliba Pakistan tsüngta mutual defense pact ka zülutepogo, kong linük ka nung amakbaji linük anaprong nung amakba ama züngshitsü shia lir - koba Israel-i taoba hopta Qatar nung amakba sülen züngzüktepba tongtipang mera ka alitsü.

Saudi Arabia ya Pakistan den rongsenketzüng, tamangba yimsü aser security tsütsü mapang talangka nungi tesendaktep lir aser Islamabad-i nuclear nok-nü yangluba nunga senotsü teyari agütsütsü dena lir. Iran indang atomic sentong mechi tebilemtsü tuluba akumba ajanga Islamabad indang nuclear umbrella kübok Saudi Arabia aitdaktsü nung ajungtsü ta Pakistani diplomats temia shia aru.

Ajisüaka iba pact zülutepba mapang yagi Israel mechi amai ajiteter, kechiaser Middle East nung nuclear nok-nü aliba linükji Israel ya dang lir ta temulung

melemi arur aser Hamas-i October 7, 2023 nü azüdokshiba sülen Iran, Lebanon, Palestinian territories, Qatar, Syria aser Yemen nung makyonga arur.

Qatar nung amakba sülen Gulf Arab linük kati defense tsütsü tongtipang telemtetba agiba ibai mezüngbuba alitsü.

Saudi Arabia indang Crown Prince Mohammed bin Salman-i iba pact ya Bodhbarnü Pakistan Ato Kilonser Shehbaz Sharif den zülutepa liasü.

Iba tezülutepba nungya bomb indang mejeta shia mali, saka linük ka dak amakbaji anaprong dak amakba ama züngshitsü, ta Pakistan indang Foreign Affairs Ministry aser sorkar meyong Saudi Press Agency sangdong ajanga ashir.

"Iba agreement nükjidong ya linük ana tsüngta defense cooperation yangertsü aser tashiyim amshiba anema lungjemer nokdaktsü asoshi tashi itshitsü," ta sangdong ajanga ashi.

Saudi ketdangsür kati iba

tezüngzüktep nungya Pakistan indang nuclear protection dena lir aser nüngdakba mapang mitkar tashi ajak amshitsü ama ashi.

Saudi Arabia nung aliba Islamic yimtsü tsütsü temeshi Mecca aser Medina tesemtem kumzüka ayutsü tejangraba Islamabad dak aliba mechi Pakistan aser Saudi Arabia tsüngta defense tesendaktep ya mapang talangka nungi lir.

1960s tatemlen Yemen nung Egypt rara mechi Pakistan sepaitem Saudi Arabia-i mezüung oa liasü.

Iran indang 1979 Islamic Revolution aser Saudi Arabia ya Tehran den rara adoktsü tetsübo agi item tesendaktep tali akum.

India indang atomic bombs den tokteptsü asoshi Pakistan-i nuclear nok-nü yanglu tenzük. Kidanger linük ana tsüngta aiben raraogo aser India kübok aliba Kashmir nung April ita tourists dak amakba sülen tera agi rara metenzük.

(Maneni tapak 8 nung...)

Israel-Hamas rara nung Palestine nung asüba 65,000 alemogo

Jerusalem, Rongjui/Sept. 18 (Agencies): Bodhbarnü Israel sepaitem aser tanks tem Gaza City telungbai ai aser nisung tali-tali jena aor aser phone aser internet services raksar Palestine nungeri ambulances ajatsüa tasak kumogo.

Kasa mapang Israel-Hamas rara nung Palestine nung asüba 65,000 alemogo ta yangji aliba health ketdangsür temi ashir.

Israel mitkar temi ashiba agi, par air force aser artillery units temi anogo ishika tsüngta iba yimti nung 150 ben dak tali makogo aser iba sülen alilen nungi sepaitem ayaok. Yamaji amakba mapang nisung mesütepa jenoka aliba süki alidak ki talang laokdaktsü. Item towers ya sepaitem reprangtsü asoshi Hamas-i amshir ta Israel-i ashir.

Phone aser internet services raksaba ajanga Palestine nung temi teyari memeshiteter, tesem balala nungi osang agitepa nüburtem anizüker aoba nung tetsükdaktsü ajurur, aser Hombarnü nungi asendenshir amakba indang osang tejangja monguteter, ta ashir.

Bodhbhar aonung amakdang tetsür aser tanur densema nisung 16 tepset, ta mozüki ketdangsür temi ashir. Gaza nung nisung asüba züngdangba nung 65,062 jungogo, ta Gaza indang Health Ministry ajanga

ashir. October 7, 2023 nü Hamas-i Israel south tsütsü maka rara tenzükba sülen Palestine nung 165,697 yiruogo ta ashir.

Health Ministry yagi civilian mesüra telungpur asüba tebendang mashir aser UN aser independent experts temi asadangba den meneptepa lir.

Israel-i bomb pokloksüba ajanga Gaza tesem tuluka samatsüogo aser yangji aliba nütsüung yongsük shilem 90 shi pei ki yutsür tesem balala nung jenoka 'humanitarian crises' adoka lira ser mongin temi Gaza City nung ayawara lir ta ashir.

Palestine nungertem yimti nungi kar gari aser kar tetsüung agi jena ao. Nisung timba ainshidaktsütsü asoshi Israel-i Bodhbarnü nungi tenzüka anogo ana atema Gaza City south tsütsü corridor ka lapoka lir.

Iba rara tenzüker Israel sepaitemi Gaza City nung aiben tesem balala maka arur, saka telungpur tem tali ang adenshir. Tang Israel-i iba yimti agitsü züngzüka lir.

Hamas-i aniba telungpur temi October 7, 2023 nü Israel south tsütsü arütsü alema aita civilian timba süir nisung 1,200 shi tepseter ano nisung 251 pua bener aoba ajanga Gaza nung rara ya tenzük. Pua bener aor nisung 48 tang tashi Gaza nung lir aser parnok tesadang ka dang tajemba takum lir südi ta amanger.

OFFICE OF THE CHANGTONGYA YIMSENTSÜR TELONGJEM CHANGTONGYA TOWN P.O. CHANGTONGYA - 798613 TENUNGSANG AGUTSÜR

Changtongya Yimsentsür Telongjem, Changtongya Town ajanga Wb. N. Temsu Longkumer aser Wt. Aosenla na jabaso **Sp. LANUTEMJEN**-i Nagaland Public Service Commission ajanga agiba tatidang nung Sub-Inspector, Home Department, Police Establishment Branch menden ngutetba asoshi tenüngsang agutsür.

Tsüngremi pa takum aser wadang nung maneni moajangma.

Sd/-
TOSHIRENLA
President
Changtongya Yimsentsür
Telongjem
Changtongya Town

Sd/-
WATIRENLA
General Secretary
Changtongya Yimsentsür
Telongjem
Changtongya Town

AO RIJU SANGDONG

- Ao Riju-i achaayanga agiba Arangtet Tatidang 2025 Mongputeni 1-3 tashi tesem ana nung agitsü.
 - Mokokchung : Model Hr. Sec. School, Arkong Ward. (9089816427)
 - Kohima : KABA. Chandmari Fellowship SS. Hall (8794043063)
- Taoba mapang metetdakja aliba ama Ao oshi zülumen tetoktepba (Ojang Lutet) telok ana küma lemdanger agitsü. Ibaji class 5-8 aser class 9-12 ta alitsü, iba nung telemsa shia nungi:
 - School ajak nungi tetoktepba telemsa shia nisung anana alitsü.
 - Iba tetoktepba nung shilem agitsüpurtem Rongjui (Sept) 30, 2025 tashi tenüng tejangja den, tongteprateptsü atema tesayur ka mobile number Ao Riju office (9436436180) tongtsütsüla.
 - Iba tetoktepba Mongputeni (Oct) 18, 2025 anogo, Aor Kilem (Conference hall) nung anepdang 9 ako nungi tenzüka agitsü. Anungi tetokteper ajak 8:30 ako nungho tesem tonger alitsüla.
- Kasa metetdakja aliba ama College nung azüngertem atema Rajem zülü (Essay Writing) tetoktepba, Rongjui 27, 2025 anogo AKM Kilem nung anepdang 10 ako nungi tenzüka agitsü.

Sd/-
(Prof. Rev. Rongsen)
Chairman

Sd/-
(S. Wati Ozüküm)
Secretary

GOVERNMENT OF NAGALAND
DIRECTORATE OF INDUSTRIES & COMMERCE
e.mail:industrynaga@gmail.com,e-fax:-08468825666
www.industry.nagaland.gov.in

ADVERTISEMENT

NO.IND/EXH-PUB/IITF/2/93(Vol-VI):

Dated Kohima, the September 2025

Interested Entrepreneurs/Societies/Awardees those who are expert onIndigenous Local Produce of Handloom & Handicraft are hereby invited for allotment of stall during the Exhibition cum Sale of Handloom & Handicraft Products at India International Trade Fair (IITF) at Bharat Mandapam, New Delhi from 14th to 27th November 2025.

The Theme for the IITF 2025 is "Ek Bharat, Shreshtha Bharat"

Stall will be allotted to the selected entrepreneurs by the Selection Committee of the Department.

Application in plain paper alongwith sample with detailed items to be displayed/exhibited/proper authentic address and contact number to be submitted to the Directorate of Industries & Commerce (Room No-34, First-Floor, Development Branch), Kohima from 19th September 2025 to10th October 2025. All the sample items will be screened by the Committee and the short listed applicants shall be interviewed for final selection. The selected participants should strictly adhere to display the items produce by them. Selected participants will not be allowed to display non-local readymade items/ products in the Exhibition. No applications will be entertained after the last date of submission.

(P. Tokugha Sema)
Directorof Industries & Commerce

Tening nung Inter-Departmental Badminton asayamung tenzükogo



Dimapur, Rongjui/September 18 (TYO): 1buba Tening Sub-Division Inter-Departmental Badminton asayamung September 18 nü tenzükogo. Asayamung lapokba sentong nung ADC Tening, Furhesie Nyuwi, NCS alakteta jaoker liasü.

Sentong nung o jembiba mapang Nyuwi-i, iba asayamung ya takok angutsü atema dang masü saka sorkar department balala aser sorkar tenzükertem tsüingda tesendaktep tajungba küma yanglushitsü atema lir ta ashi.

"Iba asayamung ya kati ka metetteptsü aser iba tesem nung aliba nüburtem tali tajungba metettsü atema sabang tajung ka lir," ta pai ashi.

Paisa, lanurtem saisabong nung shilem agitsü aser taküm nung libaliro tajung beshitsü atema ajungmesotsü koda tongtibang iba indang lemsatepba den, iba asayamung kanga junga ayongzükba atema asayamung ayongba committee nem tenüngsang agüja liasü.

Taküm iba asayamung nung tebur tarep team 21 dak tema aser tarep temeyoktep asaya

nung tarep 14-i shilem agidar, koba September 19 nü tembangtsü.

Asayamung lapokba sentong ya SDAO Tening, Samsangheile lenisüba nung agi, Er Volie Rentta, SDO PHED Tening-i lokti pela agizükba o jembiba aser VP GHSS Tening Rosca Jimo-i tepela o jembiba liasü.

Iba asayamung ya Badminton Club Tening-i ayongzük aser iba ajanga sorkar department aser tenzükertem sabang ka nung longjemdaksüogo.

NSF MM Trophy: Miachazou FC & Ward-19 nati asaya akok

Kohima, Rongjui/September 18 (TYO): Tang asaya aliba 25buba NSF Martyrs Memorial football asayamung nung Brehostibarnü Indira Gandhi Stadium Kohima nung Miachazou FC aser Ward-19 nati pei tata asaya kokogo.

Mezüngbuba asaya nung Miachazou FC-i goal 2-0 agi Raisers FC akok.

Asaya nung goal anaprongla ya Vito Tepa-i minute 46 aser 88buba nung idakja liasü. Team takok dangi aniba sülen pa nem player of the match agütsü. Iba

naroküm ya 9th Kohima Town A/C MLA Tseilhoutuo Rhutso-i agüja liasü.

Tanabuba asaya nung Ward-19-i tesülen nungi meyipa tur Phezoucha Rhüba Youth Organisations goal 4-1 koka liasü.

Asaya nung mezüngbuba goal Razouvito Tsükrü-i Phezoucha atema minute 34buba nung idaktsü saka minute 46buba nung Sagolsen Bikash-i Ward-19 atema mezüngbuba goal idaktsü aser paisa minute 60buba tanabuba

goal idakja liasü. Maneni Laiwang Bohham aser Laba Jr nati minute 60 aser 80bu ba nung goal kaka idakja liasü.

Iba asaya atema Ward-19 nungi asayar Jainchun Rongmei nem man of the match award Naga Students Federation tatong tir Vimeyiekho Vitso-i agütsü.

September 19 nü asaya:

1. Phesama Students Union vs Corinthians FC @12 noon
2. Chedema Village Youth Organisations vs Kidima Farmers United.

Nepal den asaya atema WI team nung uncapped asayar 5 shimogo

Rongjui/September 18, 2025 (Agencies): Nepal den Sharjah nung T20I asayamung atema West Indies-i parnok indang squad nung tang mezüngbuba linük team nungi asayatsü atema asayar pongu züngoksemogo.

Iba asayamung atema captain Shai Hope nem anisüngzük agütsüogo aser pa maliba mapang Akeal Hosein lenisüba nung team ya asaya asem asayatsü, koba September 27 nü tenzüktsü.

West Indies team nungi tang mezüngbuba asayatsü aliba asayar pongu ya Akeem Auguste, batting all-rounder Navin Bidaisee, leg spinner Zishan Motara, left-arm quick Ramon Simmonds, aser wicketkeeper-batter Amir Jangoo nunger lir.

Parnok den külemi batter Karima Gore-a team nung züngoksemogo. Gore ya USA team nungi T20I ti nungbo

asayatokogo aser pa tang mezüngbuba West Indies nungi asayatsü atemateam nung züngoksemogo.

CPL asayaba mapang Antigua and Barbuda Falcons nungi Gore-i kanga junga asayaogo. Pai asaya 11 nung run 219 yanglu. Hosein den ano asayar tejentem rongnung Fabian Allen, Jason Holder, Kyle Mayers aser Obed McCoy nunger densema lir.

Iba asayamung atema Rayon Griffith head coach asütsü aser Ottis Gibson fast-bowling consultant asütsü. Tang mezüngbuba Nepal aser West Indies na bilateral series ka asayatsü lir.

"Nepal den asayatsü aliba asayamung ya West Indies cricket mangdang atsülangshitsü atema tongtibang jenjang ka lir. Iba ajanga senior tebur team nem tang renloka oya aliba linük den asayatsü aser conditions balala nung asayatsü

asoshi maongka agütsür," ta Cricket West Indies Director of Cricket, Miles Bascombe-i ashi.

Mezüngbuba T20I asaya ya September 27 nü asayatsü aser tanungba asaya ana ya September 29 aser 30 nü asayatsü.

West Indies squad: Akeal Hosein (capt), Fabian Allen, Jewel Andrew, Akeem Auguste, Navin Bidaisee, Jediah Blades, Keacy Carty, Karima Gore, Jason Holder, Amir Jangoo, Kyle Mayers, Obed McCoy, Zishan Motara, Ramon Simmonds and Shamar Springer.

Nepal squad: Rohit Paudel (Captain), Dipendra Singh Airee (Vice-Captain), Aasif Sheikh, Sandeep Lamichhane, Kushal Bhurtel, Lokesh Bam, Kushal Malla, Mohammad Adil Ansari, Aarif Sheikh, Sandeep Jora, Karan KC, Nandan Yadav, Gulshan Jha, Lalit Narayan Rajbanshi, Sompal Kami, Shahab Alam.

China Masters: PV Sindhu quarterfinal-i iogo

Rongjui/September 18, 2025 (Agencies): Tang asaya aliba China Open nung India tsürtem rongnungi nungtugu badminton asayar PV Sindhu-i Brehostibarnü Thailand tsür Chochuwong koka quarterfinal-i iogo, aser tabur tarep asayar Satwiksairaj Rankireddy aser Chirag Shetty nata quarter tongtetogo.

Tetsür kija asaya nung Olympics nung medal ana tashi ngur alila Sindhu-i Thailand tsür sixth seed Pornpawee Chochuwong ya 21-15, 21-15 agi minute 41 nung koka liasü. Tena tsüingda tang tashi nung 11 ben asayaogo aser Sindhu-i trokben kokogo.

Sindhu quarterfinal nung Korea tsür top seed An Se Young den asayatsü, shibai Denmark tsür Mia Blichfeldt 23-21, 21-14 agi koka liasü.

Iba asaya akokba indang jembiba mapang Sindhu-i, "iba asaya akokba atema kanga pelar aser ni tetenzük nungi kanga küküma aser noklang nung noklang tashi agüja asayatsü kanga tongtibang liasü. La ya temaba jenjang nung asayaba asayar ka lir. Ni la den Indonesia Open nunga asayaogo aser iba mapanga kanga toktepa asayaogo. Mezüngbuba game akokba sülen ni tanabuba game nung tali tekümkümba aküm," ta lai ashi.

Sindhu, shiba taoba hopta Hong Kong Open nung mezüngbuba round nung tsüka liasü, lai asaya kara akoktsü



koda tongtibang iba indang jembiba. "Asaya Straight game nung akokba ajanga nü sasa dak tali temulung lemteta kumdaktsür. Ajisüaka na asaya talangka asayatsü atema-a renema alitsüla," ta lai ashi.

Kasa asayamung tebur tarep asaya nung Satwiksairaj Rankireddy aser Chirag Shetty nati maneni kanga junga asaya-a Chinese Taipei nunger tarep Hsiang Chieh Chiu aser Wang Chi-Lin na 21-13, 21-12 agi minute 32 nung dang kokogo. India nunger tarep ya Hong Kong Open nung runners-up liasü aser tena quarterfinal nung China nunger tarep Ren Xiang Yu aser Xie Haonan na den asayatsü.

Toba mapang world No.1 tarep yagi Kong Open nunga Chiu aser Wang na koker liasü aser iba asaya nunga mezüngbuba game nung tena 7-2 agi tejakdang ser tenzükba sülen asaya tatem tashi tenati amokbanger asaya liasü.

BENDANGLI OSANG : Tapak 7 nungi...

Saudi Arabia-i Pakistan den...

India ket nung nuclear warheads 172 aser Pakistan ket nung 170 lir ta US-i züluba Bulletin of Atomic Scientists ajanga ashir.

Retired Pakistani Brig. Gen. Feroz Hassan Khan-i par linük indang nuclear weapons program indang "Eating Grass: The Making of the Pakistani Bomb" nungja agütsür kaket ka züluba nung, Pakistan nem temerenshi agüja aliba mapang par nuclear program maneni inyaktettsü mechi Saudi Arabia-i senotsü teyari agütsü, ta shia lir.

Pakistan-i iba bomb yanglutsü merangba mechi US-i küm aika temerenshi agüja aru aser ano Biden administration tatemlena par ballistic missile mapa mechi temerenshi tasen agüja liasü.

Saudi Arabia-i civilian nuclear power program renloka aotsü atema US teyari meshia liasü, ajisüaka Israel-i Gaza amakba aitsüba aser crown prince ajanga Israel-i Gaza Strip nung kin ajunga samatsütsü meranger ta jembiba yong US nungi telangzüba tajung agüja mali.

Ajisüaka Iran ket nung nuclear nok-nü lira onokia yanglutsü, ta Prince Mohammed-i shia lir. Saudi Arabia ya domestic ballistic missile program ka lir südi ta amanger, koba nuclear nok-nü atema delivery system ka asütsü akok. Ajisüaka iba linük ya Nuclear Nonproliferation Treaty nung züngsem lir aser par mapa ajanga bomb yanglutsü mera agiba memetet.

BILEMDANGANG

"Mapa inyaksaba dang nungibo minykdangba tesasa tuluba asür."